



ज्ञजलपा वलह्यो

JWOJALAPA WEEKLY

दैं ७ ल्या: २७ (पूर्णङक १२९) ने. सं. ११३७ सिल्लागा दुतिया आइतवा: २०७३ फागुण ०१ गते आइतवार (Feb- 12, 2017)

मू द- पृष्ठ ६

प्रचण्ड सरकारं अन्तिम इलय् तक नं कुतः याइगु देउवा नेतृत्वय् दयेकीगु सरकारं प्रदेश व संघीय संसदया चुनाव याइगु

नेपाली कांग्रेसलिसे पालंपा: सर कारया नेतृत्व यायेगु सहमति याना संघीय गठबन्धनया नं समर्थनय् दयेकूगु प्रचण्ड नेतृत्वया सरकारं चुनाव यायेगु अन्तिम इलय् तक नं कुतः याइगु जूगु दु । संघीय गठबन्धनलिसे नं सहमतिया आधारय् हे थःगु नेतृत्वया सरकार गठन जूगुलिं संघीय गठबन्धनया माग कथं संविधान संशोधनयात परिमार्जन याना संसदपाखें पारित यायेगु अन्तिम कुतः तक नं वर्तमान सरकारं याइगु अवस्था दु ।

संविधान कार्यान्वयनया नितिं चुनाव यायेमा:गु जुया चुनाव यायेगु धका: अन्तिम इलय् तक नं धायेमा:गु सरकारया बाध्यकारी अवस्था खः । उकिं संविधान संशोधनया प्रस्तावयात कया परिमार्जन नं यायेगु अले चुनाव नं यायेगु धका: लगातार रुपं प्रधानमन्त्री नापं माओवादी केन्दया अध्यक्ष प्रचण्ड सार्वजनिक रुपं न्ववना वयाच्चनादीगु खः । प्रमुख प्रतिपक्ष एमालें थें तप्यंक हे चुनाव जक यायेगु धका: नं

समाचार विश्लेषण

श्रीकृष्ण महर्जन

धाये मजिउगु अले आन्दोलनरत संघीय गठबन्धनया नेतातयसं थें हे संविधान परिमार्जन याना न्हापां संसद पारित याना जक चुनाव यायेगु धका: नं धाये मजिउगु अवस्थाय् प्रचण्ड निगू हे खंयात नाप नापं यंकेगु ज्या यानाच्चनादीगु दु ।

थ्व हे भ्रूलय् संघीय गठबन्धनया नेतातयसं जुइगु वार्ता वा सहलहया भ्रूलय् प्रधानमन्त्री प्रचण्ड न्हापां संविधान संशोधनया प्रस्तावयात कया परिमार्जन याना संसद पारित यायेगु धका: धया वयाच्चनादीगु दुसा अथे हे प्रमुख प्रतिपक्ष लगायत प्रतिपक्ष दलया नेतात नापलाइगु अवस्थाय् चुनाव यायेगु धका: धयादीगु दु । उकिं प्रमुख प्रतिपक्ष व आन्दोलनरत संघीय गठबन्धनया नेतातयसं तकं प्रधानमन्त्रीया सार्वजनिक रुपं आलोचना यायेगु नाप नापं

थःथःपिनिगु खँ सम्बोधन मयात धा:सा आन्दोलन यायेगु धका: ख्याच्च: वियादीगु दु । थ्व हे दथुइ कांग्रेसया नेतातयसं तकं प्रधानमन्त्री प्रचण्डया उगु कथंया भूमिकायात कया सार्वजनिक रुपं आलोचना याना प्रचण्डया कारणं हे चुनाव मजुइगु संभावना अप्वया वल धका: तकं धायेगु यानाह:गु दु । वइगु माघ महिना तकया दुने प्रदेश, संघीय प्रदेश व स्थानीय तहया निर्वाचन यायेमा:गु संवैधानिक बाध्यकारी अवस्था दुगुलिं आ: छगू छगू याना चुनाव याये मफइगु अवस्थाय् स्वंगू हे तहया चुनाव छक्कलं यायेमा: धायेगु तकं यानाह:गु दु । अथे धका: सर कारं नापं निर्वाचन आयोगं धा:सा उगु कथंया तयारी यानाच्चंगु मदु ।

सरकार व निर्वाचन आयोगपाखें न्हापां स्थानीय तहया चुनाव हे



यायेगु धका: तयारी कथं न्ह्या वनाच्चंगु दु । स्थानीय तहया चुनावया मिति घोषणा यायेगु जुइ अले चुनाव यायेगु जुइ धका: थ्व हे फागुनया न्हापांगु वा: तकया दुने वहस जुइगु अवस्था दु नेपा:या राजनीतिइ ।

अनं लिपा स्थानीय तहया चुनाव ब्यागलं कथं याये मफइगु अवस्था ब्वलनी अले स्थानीय तहया चुनाव न्हापां यायेगु वहस क्वचाया प्रदेश व स्थानीय तहया निर्वाचन नाप नापं यायेगु वहस सुरु जुइगु

अवस्था वइ । अनं लिपा वैशाख महिना तकया दुने प्रचण्ड सर कारया थासाय् मेगु सरकार हयेगु कथंया खेल सुरु जुइ ।

संसदया दक्ले तःधंगु दलया ल्याखं नेपाली कांग्रेसया सभापति शेरबहादुर देउवाया नेतृत्वया सर कार गठन जुइ । अनंलि संविधान संशोधनया प्रस्ताव परिमार्जन सहित संघीय गठबन्धनया माग छुं छुं दुथ्याका संविधान संशोधन याइ । अले प्रदेश व केन्द्रीय संसदया चुनाव मंका: कथं यायेगु

घोषणा जुइ । स्थानीय तहया पुनर्संरचनाया सवालय् विवाद कायम जूगुलिं प्रदेश व केन्द्रीय संसदया चुनाव यायेत संघीय गठबन्धन तकं तयार जुइ अले माघ महिनाया न्हापांगु वा: तकया दुने संविधान कार्यान्वयनया नितिं चुनाव जुइ । संघीय गठबन्धनं माग याना वयाच्चंगु प्रदेश अन्तर्गत स्थानीय तह तयेगु ज्या नं जुइ अले चुनाव नं जुइ । अन्ततः अन्तिम इलय् वया चुनाव यायेगु ज्या जुइगु अवस्था अप्वया वःगु दु ।

किपूया सुथ न्हापां चितुवा वया आतकं, न्हिनय् बेहोस याना नियन्त्रणय्

ज्वजलपा वा:पौ/

किपुलिइ इलय् ब्यलय् चितुवा वया आतकिन यानाच्चंगु दु । गबलें बस्तीइ दुने हे वइगु अले गबलें ला मनूयात आक्रमण तकं याइगु । विशेष याना

चिकुलाया इलय् अथे चितुवा वयेगु यानाच्चंगु दु । उकिं चिकुला जुलकि चितुवा वइगु जकं मखुला धका: सुथ न्हापां मनूत ग्या चिकु पहरु: पिकना जुइमा:गु अवस्था दु ।

थ्व हे भ्रूलय् वंगु बुधवा: किपूया न्हूवजारय् विजेन मानन्धरया पस: दूगु छें ल्यूने व रमेश महर्जनया छें ल्यूने वःमह चितुवायात न्हिनय् जक ज्वनेत ता:ला:गु दु ।

धकासी लिक्क वंमह चितुवा श्रीकृष्ण महर्जनया छें ल्या लियुने सुलाच्चंगु अवस्थाय् ता ई तक कुतः याना चितुवायात बेहोस याना चिडियाखानय् यंकेत सफल जूगु खः । बुधवा: सुथ

न्हापां वःमह चितुवायातया स्थानीयवासी थ्यंमथ्यं ७:३० ता इलय् खंगु खः । अले उमह चितुवायात स्थानीय प्रहरीपिन्सं छुं याये मफुसेलिं चिडियाखानाया कर्मचारीपिं व प्रहरी जाना: बेहोस जुइगु गोली क्ययेका: बेहोस याना जक उमह चितुवायात नियन्त्रणय् कायेत ता:ला:गु खः ।

चितुवा मिसाम्ह खः धका: धा:गु दु । अथे चितुवा वःगुलिं उगु लागाय् ता ई तक चितुवा स्वयेत म्व:म्व: मनूत मुनेगु ज्या तकं जूगु खः ।

अले बेहोस याना पित हःगु इलय् यक्व हे मनूतयसं थःथःगु मोबाइलपाखें चितुवायाया किपा: कायेगु नापं भिडियो कायेगु ज्या तकं या:गु खः । गुलिं गुलिसिनं ला चितुवायात थिया स्वयेगु तकं या:गु खः ।





ज्वजलपा वा:पौ

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweekly@gmail.com

सम्पादकिय

शंखरापुर पहिचानया आन्दोलन

सक्वया स्थानीयवासीतय्सं शंखरापुर नगरपालिकायात मनोहरा नगरपालिकाय् ल्वाकछ्याना शंखरापुर नगरपालिकाया अस्तित्व समाप्त यायेत्यन धका: शंखरापुर नगरपालिका कायम जुइमा:गु माग याना आन्दोलन यानाचवंगु दु । स्वयेबले सामान्य खँ थें च्वं । शंखरापुर नां छगूया जक खँ ख:थें च्वं । तर शंखरापुर नांया ल्यूने स्विनिग:या आदिवासी नेवा:तय्गु सभ्यता, नेवा: संस्कृति अले नेवा:तय्गु नाप नाप सक्वया स्थानीय मनुतय्गु पहिचानया मुद्दा नाप नं स्वानाचवंगु दु ।

ऐतिहासिक रुपं, सांस्कृतिक रुपं अले सभ्यताया ल्याखं नं तसकं महत्वपूर्णगु जक मखु स्विनिग:या हे तसकं पुलांगु शहरया रुपय् स्थापित जूगु थनि स्वद्व:दसिबे न्ह्य:या इतिहासया घटना नाप नं स्वानाचवंगु शंखरापुर शहर ख: । शंखरापुर शहरया नां कायम यायेफत धा:सा अन नेवा:तय्गु नाप अनया स्थानीयवासीतय्गु अस्तित्व ल्यनाचवनी । मखुसा अनया स्थानीयवासी व नेवा:तय्गु म्हसीका हे तनावनी धका: थुइका आन्दोलन याना वयाचवंगु ख: । थुगु आन्दोलनया भुवलय् शंखरापुर नगरपालिका मजुइगु खत धा:सा वरु गाउँपालिका जुयाचवनेत तकं तयार धका: स्थानीयवासीतय्सं धयाचवंगु दु ।

थुकिया अर्थ थ:पनिगु पहिचान, नेवा: नाप सक्ववासीतय्गु पहिचान नाप स्वाका आन्दोलन यानाचवंगु खने दु । थ्व आन्दोलन धइगु नेवा:तय्गु पहिचान नाप स्वानाचवंगु अले थुगु आन्दोलन सफल जुल धा:सा मेमेगु थासय् नं नेवा: पहिचानयात ल्यंका तयेगु आन्दोलनयात उर्जा बिइगु अवस्था वइ धका: नेवा: न्ह्यलुवातय्सं थुइकेमा:गु अवस्था व:गु दु ।

गजल शौरभ शाक्यया

गजल-१९



सुनां नुग: स्याकल, गथे धाये छंत:
ख्विं नुग: प्याकल, गथे धाये छंत: ।
मिहग छं लँयसं पना न्यन, छुं खँ छं जिके
खँ फुकं च्याकल, छं गथे धाये छंत: ।
हे भगवान !, सुइतं मजुइमा:जित:थें
अह..ह मभिनं त्याकल, गथे धाये छंत: ।
मसिउ छु याना वं, गुतू क्वात जित:
ध्याक्वय् वं न्याकल, गथे धाये छंत: ।
नुगसं च्वचिना, तिति पापायाना तया
वं आसं जित: द्याकल, गथे धाये छंत: ।

दौरा सुरुवाल, राष्ट्रिय भण्डा व नेपाली राष्ट्रियता



-सानुराजा शाक्य

एमालेया केपि ओली प्रधानमन्त्री जुवल्य फुकक मन्त्रीतसें दौरा सुरुवाल-लं फिइमा:गु अनिवार्यता या:गु ख: । उखुन्हु तिति एमाले या:गु प्रदर्शनय् चन्द्रसूर्य अंकित राष्ट्रिय भण्डा ज्वना: प्रदर्शनय् वयेत या:गु अपिलया लिउने एमालेया विचार धाराय्:गु स्वलन जक ख:ला धका: बौद्धिक वर्गय् चर्चा नं जुल । थुकिया बारे छुं भचा चर्चा यायेगु प्रासांगिक जुइगुलिं थ्व च्वसू थ्वहे विषयय् केन्द्रित जुया च्वयागु ख: ।

हिन्दू मान्यताया अर्थदुगु चन्द्रसूर्य अंकित राष्ट्रिय भण्डा व दौरा सुरुवाल पंचायतकालय् पंचतय्गु पहिचान कथं प्रचारित जुल । जनताया मनय् दुगु राष्ट्रिय भावनायात पञ्चायतकालय् दरवार व पञ्चतसें राष्ट्रिय भण्डा व दौरा सुरुवालया प्रयोग याना: थ:गु पक्षय् तया तयेत स्व:गु ख: । थ:गु सत्ताया निरन्तरताया नितिं दरवार व पञ्चतसें चन्द्रसूर्य अंकित राष्ट्रिय भण्डा व दौरा सुरुवालया गुगु प्रयोग या:गु ख: थुकिया कपि थौंकन्हे एमाले यानाहल । पञ्चायतकालय् पञ्च मण्डलेतसें चन्द्रसूर्य अंकित राष्ट्रिय भण्डा ज्वना: गुगु दुरुपयोग या:गु ख: उकिया निरन्तरता थौंकन्हेया एमाले यायेत सर्कुलर या:गु खनेदत । एमाले छुं दिं न्ह्य: या:गु प्रदर्शनय् राष्ट्रिय भण्डा ज्वना: प्रदर्शनय् व:गु घटना व विद्यार्थी चुनावय् राष्ट्रिय भण्डा ज्वना: प्रचारय् वनेगु निर्णय पञ्चायतकालय् मण्डलेतसें या:गु प्रयोगया पुनरावृत्ति जक ख: । उकिं हे जुइ थौंकन्हे उबलेया मण्डले नाइके कमल थापा व एमालेया नेतातय् दथुइ राष्ट्रवादयात स्वयेगु दृष्टिकोण छता हे जूगुलिं राजनीतिक सहकार्य जुयाचवंगु ।

चन्द्रसूर्य अंकित राष्ट्रिय भण्डायात पंचायतया अन्त लिपा बहुदलीय प्रजातन्त्रय् सरकारी औपचारिकता बाहेक कांग्रेस कम्युनिष्टतसें थ:गु राजनीतिक गतिविधि प्रयोग मया: । तर आ: वया राष्ट्रिय एकताया नितिं वा राष्ट्रिय अखण्डताया नितिं धका: एमाले चन्द्रसूर्य अंकित राष्ट्रिय भण्डाया प्रयोगयात पार्टी हे औपचारिकता बियेगु निर्णय या:गु खनेदत ।

एमालेया नेतातय्के आ: वया चन्द्रसूर्य अंकित भण्डा जक नेपा:या र राष्ट्रिय एकता व अखण्डता ल्यनी धइगु ज्ञां नेपाली पहाडी राष्ट्रवादीया भावना थ:गु पार्टी क्यास यायेत छय:गु जक ख: । छयालीस सालया आन्दोलन, अठ्चालिस साल धुंका: एमाले लगायत

थीथी कम्युनिष्ट दलतसें या:गु तोडफोडपूर्ण आन्दोलन, बासाई त्रिसाठीया जनआन्दोलन लगायत आन्दोलनय् एमालेया नेतातसें दौरा सुरुवाल पुना:, राष्ट्रिय भण्डा ज्वना: आन्दोलन या:गु इतिहास मदु ।

छुं दिं न्ह्य: टोपी दिवस धका: नं छुं मनुतसें दौरा सुरुवाल व नेपाली तपुली पुना: दिवस हंगु नं खनेदत । नेपा:या पहाडी लागाय् नेपाली तपुली पुयेगु परम्परा आ:या मखु । च्वमि स्वयंमयात नेपाली तपुली व दौरा सुरुवाल फियेबलय् मल्ब:गु मखु । तर अथे धका: थुकियात राष्ट्रिय पोशाकया रुपय् हे दयेकेमा: धइगु पक्षय् मदु । दौरा सुरुवालया सवालय् नं दौरा सुरुवाल नेपा:या राष्ट्रियताया समग्र प्रतिनिधित्व याइमखु । थ्व पोशाकमध्ये पहाडी लागाय् प्रचलित पोशाक ख: तर नेपा:या फुकक भूगोलयात ल्व:गु पोशाक मखु । दौरा सुरुवाल राष्ट्रिय पोशाक धका: हिमाली लागाय् छयले फइमखु । हिमाली लागाय् अनया मौसमकथं वक्खु हे मा: । उकथं हे तां न्वइगु तराई लागाय् सालुगु याउँसे च्वंगु पोशाक मा: । संधीयताया कार्यान्वयन धुंका: मधेस लागाय् प्रदेशय् दौरा सुरुवाल फिना जुइफइगु अवस्था नं मदु । उकिं हे प्रकृतिया नियमकथं नेपा:या थीथी समुदायया थ:गु थाय्था मौसमया अनुकुलता कथं थ:थ:गु हे पोशाक दु । व फुकक नेपा:या राष्ट्रिय पोशाक हे ख: । तर मेमेगु पोशाकयात हाकुतिना दौरा सुरुवाल व नेपाली तपुलीयात जक राष्ट्रियताया मान्यता बिया: वनेमा: धइगुलिइ सहमत जुइ फइमखु ।

नेपा:या पहिचान क्यनेत दौरा सुरुवाल व तपुली पुइ हे मा: धइगु जरुरत मदु । दौरा सुरुवाल व नेपाली तपुली पूसा: जक नेपाली पहिचान खनेदइगु ख:सा भगवान बुद्धयात नं थ्व पोशाक पुइका प्रचार यायेमाली, कुमारी छ:यात नं दौरा सुरुवाल पुइके माली । वा सिएनएन सिरपा: त्याकृपिं मिसापिं, नेशनल जिओग्राफीकय् हिरो जूम्ह मिरा राई वा इण्डियन टेलिभिजनय् डान्स याना: सिरपा: त्याकूम्ह तेरिया मगरयात नं दौरा सुरुवाल व तपुली पुइकेगु ला ? मखु नेपाली पहिचान धइगु मिर्जापिसं पुनीगु दौरा सुरुवाल जक जुइमा: धइगु मानसिकता पुरुषवादी सामन्ती मानसिकता मखुला ? उखुन्हु तपुली दिवस धका: गुलि नेपाली मिस्तसें नं नेपाली तपुली पुना: सामाजिक सञ्जालय् ब्वया जूगु खना: । कन्हे मिसापिं बल्लात धा:सा नेपाली मिस्तसें पुनीगु पर्सि नं राष्ट्रिय पोशाक जुल धका: मिर्जापिसं नं पर्सि सिना: राष्ट्रिय पर्सि दिवस न्यायेकेगु कि ?

छगू इलय् दरवारय् दुहाँ वनेत अनिवार्य दौरा सुरुवाल पुनेमा:सा सिंहदरवारय् वनेत नं नेपाली तपुली पुनेमा: । हानं छक: दौरा सुरुवालया लोकप्रियता पहाडी लागाय् विस्तार जूगु दु ।

एमाले दुने विस्तार दक्षिणपन्थी विचारधारां हा: कया: हयेवं दौरा सुरुवाल, नेपाली तपुली व राष्ट्रिय भण्डाय् नेपा:या एकता खंका: हल । नेपा:या एकता अमूर्त वस्तुइ क्यना: नेपा:या थीथी समुदायया पहिचान, प्रतिनिधित्व व पहुँच थ्यन धा:सा जक र राष्ट्रिय एकता क्वातुइगु ख: । थ्व सत्ययात अस्वीकार याना: अमूर्त वस्तुइ राष्ट्रिय एकता व अखण्डता मा: जुइगु धइगु दक्षिणपन्थी विचारधारा हावी जुया व:गुया संकेत हे ख: ।

स्वत:स्फूर्त रुपं लोकप्रिय जूसा उकियात नकारे यायेमा:गु मदु । तर थुकियात पञ्चायतकालय् थें राष्ट्रियताया प्रतिक कथं थुइका अनिवार्यतां थ्व पोशाकप्रति अभ्यस्त मजूपिं नेपाली जनताया भावनायात च्यालेन्ज यायेगु जुइ वा विखण्डनया पुसा पियेगु जुइ । दौरा सुरुवालप्रति वर्तमान प्रधानमन्त्री पुष्पकमल दाहाल खस हे लगाव क्यनाचवंगु मदु । दौरा सुरुवाल फिनाजूम प्रधानमन्त्री जक राष्ट्रवादी जुइगु तर्कया छुं तुक मदु । एमालेया केपि ओली प्रधानमन्त्री जुवल्य मन्त्रीत फुकसिनं नं दौरा सुरुवाल अनिवार्य पुनेमा:गु निर्णय यात । तर इतिहासय् स्वयेगु ख:सा दौरा सुरुवालयात छगू इलय् पञ्चायतया लेगेसी कथं काइगु ख: ।

छयालीस सालया राजनीतिक परिवर्तन लिपा कांग्रेसया प्रधानमन्त्री मन्त्रीतसें दौरा सुरुवालयात अ:पुक हे स्वीकार यात तर एमालेया मन्त्रीतसें स्वीकार याये मफु उकिं छयालीस साल लिपाया अन्तरिम सरकारय् बंप्पि एमालेया मन्त्रीतसें दौरा सुरुवाल मपुं । उकथं हे एकाउन्न सालय् मनमोहनया प्रधानमन्त्रीत्व कालय् नं दौरा सुरुवाल खस हे पुंगु इतिहास मदु । उबलेय् एमालेया नेतातसें कोट पाइन्ट हे अ:पुगु पोशाकया रुपय् ग्रहण याना: विदेश वंसा वा औपचारिक कार्यक्रमय् नं कोट पाइन्टयात हे बढावा बिल ।

एमालेया वर्तमान नाय: निवर्तमान प्रधानमन्त्री केपि ओली तकं उबले कोट पाइन्ट हे फिना थ:गु राजनीतिक धर्म पुरा यात । तर एमाले दुने विस्तार दक्षिणपन्थी विचारधारां हा: कया: हयेवं दौरा सुरुवाल, नेपाली तपुली व राष्ट्रिय भण्डाय् नेपा:या एकता खंका: हल । नेपा:या एकता अमूर्त वस्तुइ क्यना: नेपा:या थीथी समुदायया पहिचान, प्रतिनिधित्व व पहुँच थ्यन धा:सा जक राष्ट्रिय एकता क्वातुइगु ख: । थ्व सत्ययात अस्वीकार याना: अमूर्त वस्तुइ राष्ट्रिय एकता व अखण्डता मा: जुइगु धइगु दक्षिणपन्थी विचारधारा हावी जुया व:गुया संकेत हे ख: ।



ज्येष्ठ नागरिक सेवा केन्द्रय् पुन्हिया ज्याभवः

ज्येष्ठ नागरिक सेवा केन्द्र पाँगा मनूतय् आस्थाया केन्द्र जुया वःगु दु। वंगु सुक्रवार सिला पुन्हि माघ २८ गते स्वस्थानी बाखं कनेगु क्वचाईगु दिं। थुगुसी स्वस्थानी बाखं सुरु जुसानिसें रामदेवी महर्जनं थः अबु स्व.शुकराम महर्जनं नेपालभाषां च्यादीगु स्वस्थानी बाखं न्हियान्हिथं कना वयाच्वंगु खः। उगु दिनय् बाखं कनेगु सिधयकीगु जुयाः लाछी दबुली हे च्वना बाखं कनेगु यात। व बाखं न्यनाः बाखं पाः तयहःपिं गःगः दत।

लाछी पांगाया लक्ष्मण श्रेष्ठया जहान विष्णुकुमारी श्रेष्ठ ७०दैँ बुन्हिया लसताय् नारायण झःयाथाय् लाख मत च्याकाः ज्येष्ठ नागरिकपिन्त जलपान दान याना हन।

अथेहे नगांया अष्टमाया महर्जन मदुगु ७ दैँ दुगु पुण्यतिथिसं वय्कःया म्हायूपिं दिलकुमारी महर्जन, नन्द कुमारी महर्जन, जमुना महर्जन, न्हुछेमाया महर्जन व कृष्ण कुमारी महर्जन थःमांया किपाः दबुली तयाः श्रद्धाञ्जली देछाय्गु ज्या यात। ज्येष्ठ नागरिकपिन्सं नं श्रद्धाञ्जली देछाय् खन। वय्कःपिन्सं नं ज्येष्ठ नागरिकपिन्त जलपानया व्यवस्था यानाविल।

अथे हे पाँगा पार्टी भेन्यूया नविन श्रेष्ठं थः बाज्या मोहन दास श्रेष्ठया लुमन्ति ज्येष्ठ नागरिकपिन्त जलपान दान याःगु खः। लाछी दबुली तयाः लच्छि यंक ला मलाः मधाःसे स्वस्थानी बाखं न्यंकःवःम्ह रामदेवी महर्जन व न्हियान्हिथं योग स्यौं वयाच्वंम्ह हिरानानी महर्जन, अथे हे बुदिं हंवःम्ह विष्णु कुमार श्रेष्ठयात सम्मान याःगु खः। अनं लिपा पवित्र कुटी विहार व नगां ज्ञानमाला भजन खलः नं ज्ञानमाला भजन नं प्रस्तुत याःगु खः। जलपान धुंकाः बान्धि सकसितं भोजन याकाःतिनि छें छवःगु खः। सल्लाहकार अर्जुन महर्जन न्ह्याक्कु उगु ज्याभवलय् थःगु नुगः खँ तयेगु भवलय् केन्द्रया अध्यक्ष दुर्गा कुमारी महर्जन सकसिनं ज्येष्ठ नागरिक केन्द्रयात मतिना याना ज्याभवः याःभागुलिं तसकं लसता वल। ज्येष्ठ नागरिकपिनिगु सेवा यायेत थःपिन्त अभ् उत्साह व हौसला वःगु खँ कंसं न्ह्याबलें थथे हे ग्वाहालि दयाच्वनीगु आशा प्वंका दिल।

जिं हाकनं धाये, संविधान पुनःलेखनया विकल्प मदु : यादव

बलजपती संविधान कार्यान्वयन यायेत्यंसा लिच्वः भयानक जुइगु ख्याच्वः

संघीय समाजवादी फोरम नेपालया राष्ट्रिय नायः उपेन्द्र यादवं उत्पीडित समुदाययात अधिकार विहीन यानाः बलपूर्वक संविधान कार्यान्वयन यायेत्यंसा लिच्वः भयानक जुइगु ख्याच्वः बियादीगु दु।

अधिकार सम्पन्न यायेत संविधान पुनःलेखनया विकल्प मदुगु लिसा कया धयादिसें संविधान पुनःलेखन मयाःसा मधेसी व आदिवासी जनजाति समुदायं अस्वीकार यायेधुंकूगु संविधान छुं नं हालतय् कार्यान्वयन जुइमफइगु यादवं ख्याच्वः बियादिल।

संघीय समाजवादी फोरम, कपिलवस्तुया न्हापांगु एकता अधिवेशनया उलेज्या सत्रयात सम्बोधन यानादिसें यादवं धयादी, “जिं तःक्वःमछि धयागु दु, संविधान पुनःलेखनया विकल्प मदु। तर, मू स्वंगू दलं जनताया अधिकारलिसे खेलवाड यानाच्वंगु दु। बलपूर्वक संविधान कार्यान्वयन यायेत्यंसा लिच्वः भयानक जुइ।”

संघीय गठबन्धनया संयोजक तर्क जुयादीम्ह यादवं धयादी, “जिमिसं सुरुनिसें हे संविधान पुनःलेखनया माग यानाः वयाच्वनागु दु। तर, सरकार गम्भीर मजुल, मुलुक दुर्घटनाय् लाःसा उकिया जिम्मा स्वंगू दलं हे कायेमाः।”

मधेसी, आदिवासी जनजाति, थारु, महिला, मुस्लिम व दलितपिनिगु अधिकार सुनिश्चित यायेत संविधानया त्रुटि सचेयानाः पुनःलेखन यायेगुया विकल्प मजुगु यादवं धयादिल।

मधेसी, आदिवासी जनजाति लिसंया उत्पीडित समुदाययात अधिकार मविइगु एजेण्डाय् कांग्रेस, एमाले व माओवादी सदां छथासं च्वनीगुलिं इपिंप्रति विश्वास मदुगु यादवं टिप्पणी यानादिल।

अथेहे, वहे ज्याभवःयात सम्बोधन यासें संघीय समाजवादी फोरमया उप-महासचिव अभिषेक प्रताप शाह नं खसवादीपिनिगु सिद्धान्तयात आन्दोलन व बलया हे भरय् परास्त यायेफइगु जूगुलिं थःगु अधिकार लाकाः कायेगु ख्याच्वः बियादिल।

ज्याभवलय् फोरम नेपालया केन्द्रीय दुजः सहसराम यादव, इसरार अहमद खाँ, अब्दुल रसिद खाँ, दधिराम थारु लिसंयापिन्सं सम्बोधन यानादीगु खः।

फोरम नेपालया जिल्ला नायः सतिशचन्द्र गुप्ताया नायःसुइ व शैलेन्द्र कुमार यादवया संचालनय् जूगु उगु ज्याभवलय् दलंढः जनसहभागिता दूगु खः।

संघीय समाजवादी फोरम नेपालया मंगलवाःनिसें न्हापांगु एकता जिल्ला अधिवेशन तौलिहवाय् न्ह्याःगु दु। जिल्ला अधिवेशनय् द्दछिम्हया जःखः अधिवेशन प्रतिनिधिपिं सहभागी जूगु दु। खुल्ला सत्रया ज्याभवलय् गांगाम फोरमया नेता व कार्यकर्तापिनिगु सहभागिताया लिसें स्थानीय मौलिक भाषाया सांस्कृतिक ज्याभवः नं न्ह्यब्वःगु खः।

-रामसेवक यादव

मङ्गल स्कूलया बिदाई, सम्मान, बधाई व पुरस्कार इनेगु ज्याभवः क्वचाल

ज्वजलपा वाःपौ/

मङ्गल उच्च मा.वि.या कक्षा १२ व स्नातक तह क्वचाःपिं विद्यार्थीपिन्त बधाई, सम्मान व सिरपाः बियाः बिदाई विइगु ज्या म्हिगः माघ २९ गते सनिवाः तःजिक ज्याभवः याना क्वचायुकल।

उगु मुँज्याया सभा नायः मङ्गल बहुमुखी क्याम्पसया नायः प्रा. डा. शिवशरण महर्जन खःसा मूपाहाँ का.जि. क्षेत्र नं.१० या सांसद राजेन्द्र कुमार के.सी, अथेहे मेपिं पाहापिं विद्यालय निरिक्षक मोतीराज खनाल, मङ्गल उ.मा.वि. व्यवस्थापन समितिया नायः अमन महर्जन, थीथी र जिनैतिक पार्टीया प्रतिनिधिपिं, थीथी सिरपाः दातापिं नापं वि.व्य.समितिया पदाधिकारीपिं व सल्लाहकारपिं भायादीगु खः। लसकुस न्वचू निमित्त प्राचार्य लोकलाल महर्जन बियादीगु खः



। अथेहे विद्यार्थी प्रतिनिधि कक्षा १२ या प्रियंका ताजपुरियां लसकुस न्वचु बियादीगु खः। अथेहे मङ्गल बहुमुखी क्याम्पस

प्रमुख प्रदीप महर्जन क्याम्पसया प्रगति विवरण बियादीगु खः। क्याम्पसया थीथी कासाय् त्याःपिन्त नं मेडल व प्रमाणपत्र ब्यूगु खः। गथेकि लङ्गजम्प,

शटपुट, कसकान्टि, १०० मिटर दौड, भलिबल, बास्केटबल, टेटे, फुटसल कासा याःगु खः।

अथेहे स्नातक तहलय् दकलय् अक्वः ल्याः हयाः पासजूपिन्त

सभानायः प्रा.डा. शिवशरण महर्जन सिरपाः इनाःदीगु खः। अथेहे कक्षा ११ पास जूपिन्त मङ्गल उ.मा.वि.या नायः अमन महर्जन सिरपाः इनाःदिल। अथेहे ज्ञान नगद पुरस्कार शिक्षा संकायलय् अक्वः ल्याःहःम्ह सोनाम महर्जनयात ज्ञानुराजा महर्जन सिरपाः लःल्हानादिल। टीका नगद पुरस्कार टीका राम महर्जन सोनाम महर्जनयात लःल्हानादिल, पूर्णलाल नगद पुरस्कार प्रा.डा. शिवशरण महर्जन सोनाम महर्जनयात कृष्ण हिरा पुरस्कार पूर्णवहादुर महर्जन सोनाम महर्जनयात लःल्हानादिल थुगु कथं शिक्षा संकाय कक्षा १२ य् ६९.२% ल्याःहःम्ह सोनाम महर्जन प्यंगु सिरपाः त्याकेत ताःलात।

अथेहे स्नातक तहलय् शिक्षा शास्त्रपाखें दकलय् अक्वः ल्याः हःम्ह विनिता पौडेल ५७.३३%

रत्नवहादुर स्नातक पुरस्कार, रत्नभाई पुरस्कार, विद्यानन्द स्मृति पुरस्कार त्याकेत ताःलाःगु खः।

अथेहे व्यवस्थापन संकायपाखे ७०.९% ल्याःहःपिं अक्षय कुमार बलामी व श्रवण कुमार चौधरी पूर्णलाल नगद पुरस्कार त्याकेत ताःलात।

कक्षा ११या जनसंख्याय् दकलय् अक्वः ल्याःहःम्ह अलिसा महर्जन स्व.सन्तवहादुर महर्जन पुरस्कार, कक्षा ११य् अंग्रेजी दकलय् अक्वः ल्याःहःम्ह दिपिका महर्जन सिटौला पुरस्कार, स्नातकतहलय् स्वास्थ्य शिक्षाय् दकलय् अक्वः ल्याःहःम्ह विष्णु कुमारी थापा, कक्षा १२ य् सर्वोत्कृष्ट ल्याहःपिं अक्षय कुमार बलामी व श्रवण चौधरीयात ओम पदक लःल्हागु दु।

मूपाहाँ राजेन्द्र कुमार के.सिं. ननिता महर्जनयात खादां क्वखाय्काः सम्मान याःगु खः।क

रामशेखरया ग्वाहालिया नितिं नेवा: पत्रकारत न्ह्यचिल

नेपालभाषा लिसं खस नेपाली भाय तर्कया ख्याल: विधाया प्रतिभाशाली कलाकार अले वरिष्ठ साहित्यकार रामशेखर नक:मियात वास: यायेत राज्यपाखें सुविधा वीकेगु ज्याय् नेवा: पत्रकार राष्ट्रिय दबुलिं पला: न्ह्याकीगु जूगु दु ।

थ्व हे भवलय् कलाक्षेत्रय् थ:गु जीवन अर्पण या:म्ह राष्ट्रियस्तरया व्यक्तित्व कलाकार नक:मिया वास: यायेत राज्यस्तरं हे ग्वाहालि उपलब्ध याकेत नेवा: पत्रकार राष्ट्रिय दबुलिं जिप्रका खपयात इनाप यासें पौ ल:ल्हा:गु दु ।

दबुलिं कलाकार नक:मिया आर्थिक अवस्थायात थुइका: वयक:यात तत्काल हे राज्यया सुविधा अन्तर्गत जिल्ला जनस्वास्थ्य ज्याकू खपपाखें ग्वाहालि उपलब्ध याकेत इनाप या:गु ख: । खप जिल्लाया प्रमुख जिल्ला अधिकारी द्रोण पोखरेलयात थौं वयक:या हे ज्याकुथिइ नापलाना: पत्रकार दबुपाखें ब्यूगु इनाप पौ ल:ल्हानाकासें थ:गु अध्यक्षताय् दुगु जिल्लास्तरीय समितिं तत्कालया लागिं १ लख तका उपलब्ध याकेत उर्ज बियादिल । प्रमुख जिल्ला अधिकारी पोखरेलं फोन मार्फत खप जिल्ला




जनस्वास्थ्य ज्याकूया प्रमुख केशव पण्डितयात वइगु आईतवा: च्वनीगु मुँज्यां स्वास्थ्य उपचार सुविधा उपलब्ध याकेगु क्व:छीत कलाकार नक:मिया नां धलखय् तयेत इनाप यानादीगु ख: । पत्रकार दबुलिं प्रजिअयात ल:ल्हा:गु पतिइ नक:मिया वास: यायेत आवश्यक च्यूता:, पहलकदमी क्यनेत लिसं अस्पताललिसे समन्वय यानावीत धयात:गु दु । उगु पतिइ वयक:या वास: यायेगु ज्याय् गुगु नं कथं म्ह्वति जुइके मवीत इनाप यानात:गु दुगु दबुया मू छयान्जे सुनिल महर्जनं लहानान्युजयात कनादिल । भक्तपुर क्यान्सर अस्पतालया मेडिकल डाइरेक्टर डा। प्रकाशया कथं वयक:या उसाँय् पायछि खनेदुसा वइगु न गते रेडियोथेरापी न्ह्याकेगु धयादिल । ‘दबुलिं इनाप या:कथं मेपिं ईच्छुक व्यक्ति संघसंस्थापित्सं नं वयक:यात ग्वाहालि यायेत अस्पतालय् तप्यंक मुनीगु कथं विशेष खाता चायेकेफइगु व्यवस्था यायेफइ, थ्व बाहेक वयक:या वास: यायेत गुगु नं कथं म्ह्वति जुइके वी मखु ।’ डा. प्रकाश धयादिल । दबुलिं मंगलवारया दुने थुगु खाताया बारे जानकारी मुंका: सार्वजनिक अपिल यायेगु तयारी या:गु सीदुगु दु । थ्वयां न्ह्य: बिहीवा: पत्रकार दबुया केन्द्रीय नाय: श्रीकृष्ण महर्जनलिसें दबुया टोली भक्तपुर क्यान्सर अस्पताल वना: नक:मि उसाँय् अवस्था उपचारबारे परिवार व चिकित्सकपिलिसे सहलह या:गु ख: ।



पांगाया विष्णुदेवी
वालकुमारी जात्रा

**बजारय् वये धुंकूगु दु
थ:गु प्रति सुरक्षित यानादिसँ**

स्वापू नितिं मेमेगु फोन नम्बर: ४३३४०१३,
९८४१७५२५८३, ९८४६०४६१२३९



बखुमद: जात्रा
न्हय्गां जात्रा

सुचं ! सुचं !! सुचं !!

ज्यापु महागुथि किपू नगर समितिया ग्वसालय्
नेपालभाषा साहित्य गोष्ठी जुइत्यंगु दु ।

साहित्य गोष्ठी जुइगु दिं

वइगु सिल्लागा आमाई फागुन (१६गते) सोमवा:
(ग्याल्मो ल्होसार)

चवसू : चिनाखं, बाखं, चिबाखं, हाइकू, गजल,
चवखं न्ह्यागु नं बिया दीफइ ।

चवसू बिइगु थाय्:

मिलन स्टूडियो अमल्सि, (रामभक्त महर्जन)

बाघभैरव आयुर्बेदिक वास: पस: (कुलबहादुर)

त:ग:वपि,

पांगा बुक्स एण्ड स्टेसनरी, धवाखासी पांगा

ग्वाहालिमि : पद्मिनी ज्वेलर्स, त:ग:वपि, किपू

संयोजक : अर्जुन महर्जन ‘नेपा:मि’

निर्वाण कामना



जन्म:

वि.सं.२०१० माघ



स्व.बाबुराजा महर्जन



निधन

वि.सं.२०७३/१०/२२

जिमि मचानिसेंया तसकं मिलय् जूम्ह पासा दथल पांगा
(थौंकन्हय् पासिद्वपा:) च्वना वयाच्वंम्ह **बाबुराजा
महर्जन “तुफान”** वंगु माघ २२ गते आकाभाकां ६३
दँय् मदुगु खँ न्यनेमाला: जिपिं तसकं मर्माहत जुया,
मदुम्हेसिया सुखावति भुवनय् बास लायेमा धका: निर्वाण
कामना यासें दु:खंक:पिं सकल छँज:पित्सं मनचिइ फय्मा
धका: बिचा: हायेका: च्वना ।

नजरराम महर्जन व छँज:पिं

धुसि, पांगा, थौंकन्हय् निखासी, किपू-३

साहित्य उपन्यास – जन्ति न्त्यात

चमि– मदन गोपाल प्रधान “क्वाःघासा”

१

कथंहे.....

न्त्यनेसं च्वंगु सिटया लिउनय् लिधंकाः तःगु बापाचा थःपाखे फःपुइकाः “जितः बियर बिया दिसँ” धकाः मुसुकाः ख्वालं श्रीं धाल । गुलि स्वल उलि हे न्त्यू ख्वाः वम्ह एअर होप्टेसं बियर त्वाःचा छ्वाः व प्लास्तिकया गिलास छ्वाः लःल्हाना बिल । “सुभाय्” व्युब्युं श्री बियर त्वाःचा व गिलास काल । बियर धाःम्हेसित बियर, ट्विस्कि धाःम्हेसित ट्विस्कि, स्क्वाय्श धाःम्हेसित स्क्वाय्श । सुना छु धाल व हे व्युब्युं वय्कः मय्जु एअर होप्टेस न्त्यव्वाना वन, न्त्यू ख्वालं सुभाय् फफ ।

खन धायेवं लुया वैगु जुया च्वन । बियर गिलासय् प्वंकाः च्वंम्ह श्रीया न्त्यने एअर होप्टेसया न्त्यू ख्वाः लुया वःगुलिं गिलासय् बियरया गाजःजायाः भयबिया थःगु पाइन्टय् लाना ख्वाउँसे च्वंसैलि व भसंग वन । भचा मछ्वाः अले ज्या मछिं पहलं थःगु खवय् च्वंपिन्थाय् छ्वाः मिखा व्वयेकल । फुकं थःथःगु हे धुनय् । साय्द इमिसं मखं जुइ माः । थःगु व्हान्तां पहः नं जुइ त्यंगु वेइजतं मुक्त जूगुलिं श्रीं याउँक छ्वाः भसुका तल । बियरया गिलास ल्हवनाः म्हुतुइ दिके मलानि “छंगु मिखा गन ?” धकाः धाःगु अतितया सः वया न्त्याःपनय् थ्वल । सः जक थ्वःगु मखु, प्रश्नया चिं धस्वाकाः थःयात स्वयाच्वंगु पिजःया ख्वाः नं न्त्यने लुयावल । म्हुतुसि दिके त्यंगु गिलास बापाचाय् दिकाः बियरया गाजः नापन्तुं बुलुहुनं खने मदया वनाच्वंगु पिजःया ख्वाः तुंक स्वया च्वन । तुयु तुयु ह्याउँ ह्याउँ धाःगु समालूगु ख्वालय् मस्यां बरां बान्किगु ततःग्वःगु मिखाया दथुइसं सुलुक्क मिंगु छाइसे च्वंगु न्हाय्या क्वसं पलेस्वां थें ह्याउँ ह्याउँ धाःगु पिजःया म्हुतुसि श्रीं थःगु न्त्यने लुइकल । अले पिने वना व्वं वने न्त्यः छन्हू क्याम्पसया क्यान्टिनय् च्या त्वना च्वंवलय्, “छंगु मिखा गन ?” धकाः वहे म्हुतुसि पिज्वःगु न्त्यसलं न्हापा क्याम्पस जीवनय् पिजःनाप जूगु आदि खँत थौकन्हय् हे थें च्वंक लुमसि वयेकल ।

खजा पिजः श्रीया क्याम्पस जीवनय् दक्कसिवय् लिक्क लाम्ह पासा खः । पिने वना व्वं वनेवं पासापिन्त ल्वःमंका छ्वइम्ह स्वार्थी मखु व

श्री धासेलि लिक्क लाःम्ह पासायात ल्वः मंकेगु ला खँ हे जुइ फैमखु । वरु दत्याति दत पिजःया पौ मवगुलिं श्रीया मन छ्वाः थातय् मलाये धुंकूगु । वयां न्त्यःला निम्हेसिया दथुइ पौया कालबिल निम्हेसियां मनया दुविस्ता ब्याः ।

पिजःयागु पौ मवःगु हुनिं यानाः थातय् मलाःगु मनयात थःगु थासय् तये मफत धाःसा थःगु व्वनेगु गुगु उद्देश्य खः व पूमवनिगु जक मखु थःगु कर्तव्य तकनं याये मफुगु सिद्ध जूवनिगुलिं श्री मनयात चिनां थःगु आजु थ्यू वनेगु कुतः याःगुया लिच्वः स्वरूप थौ व्वने ज्या पूर्वकाः थःगु मां देसय् लिहां वया च्वन । खजा वयागु स्याचुगु ज्ञांया हुनिं यानाः वयात विदेसय् हे ज्या दुगु खः । तर व थः मांयात ल्वःमंके मफु । व्वनेया लागि बाया मच्वंसे मगाःबलय् गाकं बाया च्वने धुंकल । आः हानं बाया च्वनेगु वया मांप्रतिया कर्तव्यं वयात मबिल । अयजूगुलिं थः मांया दर्शनया निंतिं ब्याकुल जुया च्वंम्ह श्रीयात घौछिनं न्हिछि, न्हिछि दछि थें जुयाच्वन ।

ट्रिलिया सः हानं तायेदत । श्रीया मिखा ट्रिलिया सः वरिखे व्वल । ट्रिलि घ्वा घ्वां “छितः ला दुगु ला कि ला मदुगु ?” धकाः न्त्यन्त्यं लादुगु धाःम्हेसित ला दुगु, ला मदुगु धाःम्हेसित ला मदुगु ज्यःना थल लःल्हा ल्हां वयाच्वन । श्री ला दुगु धाःगुलिं ला दुगु ज्यःना थल बिल । सुभाय् बियाः थःगु नसा कयाः न्त्यनेसं च्वंगु यःगाः बापाचाय् तल । थलया पुसा चायेकल । बासमति जाकिया पुलाउथें दयेका तःगु जा व नलू नलूगु खायाला प्यकू ति दु । सलादया थलय् गाजर, वन्दा व तुसिया कूचातय्सं जाः । कागति वागः नं दु । चकलेट भूमीं तुइसे च्वंगु क्रीमं बुत्ता ज्यानाः तःगु पेष्टि छ्वाः सकलें नयेगुलि व्यस्त ।

घौपलख लंकाः प्वंगु नसा थलत मुंकु मुंकुं ट्रिलिइ त तं छम्ह मेम्ह एअर होप्टस न्त्या वयाच्वन । श्रीया भवलय् च्वंगु प्वंगु थल, बियर त्वाःचा व गिलासत मुनां यंकल ।

नयेनिइ सिधयेकाः श्रीया लिक्कसं च्वंम्ह भुयु ख्वाःम्ह भाजुं चुरट बडा व लाइटर लिक्कल । बडां चुरट छपू लिक्कयाः म्हुतुसिइ काके न्त्यः श्रीयाके न्यन, “जिं चुरट त्वनां छितः मछिं जुइ ला मखु, भाजु ?” श्री न्हिला ख्वालं धाल, “भपिया दिसँ । जितः छुं बाधा मदु ।” सुभाय् बियाः व भुयुभाजुं चुरट च्याकल । चुरट च्याकाः कुँ जक ल्हवःगु न्त्यने च्वंगु सिटय् च्वंम्ह छम्ह भाजुं चुरट त्वंम्ह भाजुयात स्वयाः नायु सलं इनाप यात, “जि जहान हृदय रोगि जूगुलिं चुरटया कुँ

हलिं नेवाः गुथि किपू कचां किपुली याःगु

“भिके-ल्ट्वने-न्हूधाः यायेनु”छ्यों तया चिनाखँ गोष्ठी वंगु चिनाखँ छसिकथं

पिकया वनेगु तातुना थ्व चिनाखँ न्त्यव्वयागु खः

२०.जि नेवाः

श्यामबहादुर श्रेष्ठ

सरस्वती स्थान, थक्वाः

धिकार छिपिं जिमि सःस्यूपिं सन्तानपितः

जिं गुलि माया यानाः व्वलंकाः छिमित

अयसां भ्याः हे माया मयाः छिमिसं जित ।

गन-गन गजाःथाय् च्वीपिं वयाः

जिगु छातिइ हे च्वनाः व्वलन बांलाथाय् स्वयाः

सः स्यूपिं जातं नं च्वखिपिं

थः दाजु किजापितं सुख शान्ति तइ धकाः

छातीइ तयाः भ्यातुसा नं भ्यातु मचाया

धिकार छिपिं जि सःस्यू सन्तानपितः

दक्षिणय् च्वंम्ह जिमि माहिलिम्ह तताया सन्तानं

उत्तरय् च्वंम्ह जेठी तताया सन्तानं

जित क्वातुक्वानाः कय्-कय्च्यानाः

चःचःफुना कुचा-कुचा यानाः इपिथाय् यंकल नं

जिमि सःस्यूपिं सन्तानपिसं न्वं हे मवाः सुना नं

धिकार छिपिं जि सःस्यूपिं सन्तानपितं

जि मसःमस्यूपिं सन्तानपिं गुलि हाल गुलि ल्वात

मांया लागि गुलि सित सःस्यूपिसं

ग्वाहालि मयाः इमित

सःस्यूपिं ला जित हे मीपिं

ध्यवा जक दसा मां दाजु किजा सु हे म्वाःपिं

जिगु लागि छु याये थ्व सन्तानपिं

धिकार छिपिं जि सः स्यूपिं सन्तानपितं

२१.बुद्धभूमि

लक्ष्मी श्रेष्ठ

इमाख्यः, थक्वाः

भीगु देश नेपाः खः, बुद्ध जन्म जूगु दु

व भूमि पवित्र अति हे उच्च जूगु दु

व भूमि भीगु देश नेपाः खः

बुद्धया देगः दनातःगु गुलिजक बांलाः

व देय्गः च्वय् लुंया गजू दु

उकि दुने बुद्ध बिज्यागु दु ।

दर्शन बियादिसँ हे बुद्ध

छुं नं मसिउ जिमिसं छिगु शरण वयाच्वना

बुद्ध जन्म जूगु तथागत पवित्र भूमि

अति उच्च जूगु

जनधन पूर्णगु स्वच्छ व शान्तगु

भलभल उज्ज्वल स्वर्गः समानगु

गुलि बांलाः भीगु देश नेपाः ।

२२.निपाःख्वाः

अमिर श्रेष्ठ

थक्वाः

गुजाःगु जीवन थ्व

आशा दक्व तनावन

म्वानाच्वंसा अथें हे बनावन

सीमाल धाःसा ग्यानावल

छम्ह मनूया नामय् धिक्कार जुल ।

सलंसः दँलिपाया थ्व मनूया जुनी

छम्ह मनू जुयाः नयेमफुत

पशुं वरु संघर्ष यात

जि छम्ह जक गथे अथे हे पात ।

धर्म व परम्परां जित छु स्यन

संसार व सत्य गन वन गन

मखुगु याःपिं भनभन थाहाँ वन

जि भनभन क्वाहाँ वन ।

बलिया बोकार्थें पाः च्वंम्ह

न हालेफु न विस्युवनेफु लाचार

खिपःया जालं गःपतय् चिनातःथें

पिडा त्वपुयाः मिखां ख्वबि स्वःस्वः

अले कालयात न्हि पियाच्वंथें ।

थ्व संसार विचित्र

छपाः निपाः ख्वालं पूसा मेगु मनय्

थथे हे जुयाः धाःगु जुइ

मनूतय् निपाःख्वाः

छपाः व्वयेगु छपाः त्वपुइगु ।

तपाईको टोलमा भएका घटना कीर्तिपुरको समाचार बनाउने
हो भने तपाई एक कल फोन गर्नुस् हामी तपाईको टोलको
समाचार कीर्तिपुरको समाचार बनाईदिनेछौं

कीर्तिपुर सन्देश साप्ताहिक



कीर्तिपुरको चित्रण

किपुलिं पिदनाच्वंगु कीर्तिपुर सन्देश वाःपौ व ज्वज्वलपाः वाःपौया ग्राहक जुइगु नितिं स्वापू तयादिसँ

कार्यालयः निखासी टोलः कीर्तिपुर नपा-३

फोन नं.: ४३३३००७, ९८४१४०१०७७

ज्वजलपा वाःपतिइ छिगू चिनाखँ/बाखं/हाइकू विज्ञापन
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंकाः सः



ज्वजलपा वाःपौ

ज्याकूः निखासी त्वाः किपू नपा-३ फोन ल्याः ४३३३००७,
९८०८६२६४२० ई-मेल : kirtipur_sandesh@live.com

कीर्तिपुर सामुदायिक स्वास्थ्य केन्द्रया ७ न्हय्क्वःगु दँ मुँज्या क्वचाल



किपूया तःगःवपि संचालन जुयाच्वंगु कीर्तिपुर सामुदायिक स्वास्थ्य केन्द्रया न्हय्क्वःगु दँमुँज्या म्हिगः माघ २९ गते शनिवाः छगु तःधंगु ज्याभवः याना क्वचायकल ।

केन्द्रया नायः हिरावहादुर महर्जनया नायःसुइ जूगु उगु ज्याभवः मूपाहाँ की.न.पा.या कार्यकारी अधिकृत सुमन कुमार कार्की सुकुन्दाय् मत च्याकाः उलेज्या यानादिल । थःगु नुगः

खँ तयगु भवलय् वयकलं सेवाः भावनां समुदायपाखें संचालन यानाच्वंगु थुगु संस्थायात नगर पालिकां दँय् दसं आर्थिक ग्वाहालि यानाच्वनागु दु धयादिल । नापं थुगुसीया बजेटय् नं छुं

छुं रकम तयागु दु धयादिल । अथेहे पूर्व राज्यमन्त्री व केन्द्रया सल्लाहकार दिलिप महर्जनं थुगु संस्था नाफा कमाय् यायेगु तातुनां संचालन जूगु मखु किपूमितयगु स्वास्थ्य क्षेत्रय् सेवा

यायेगु भावनां पलिस्था यानागु खः । न्हय्दँया दुने सकसियागु ग्वाहालिं टाउनप्लानिंगय् थःगु हे छँ दयकेत ताःलाःगु दु । याकनं हे न्हूगु छँ जनपोलिक्लिनिक संचालन जुइगु खँ कनादिल । केन्द्रया न्वकू ई.मदन डंगोलं संस्थाया वार्षिक प्रतिवेदन न्हय्ब्वयादीगु खः ।

कीर्तिपुर सामुदायिक स्वास्थ्य केन्द्रया छयाञ्जे सुजिन्द्र महर्जनं न्हयाकादीगु उगु ज्याभवलय्

राराहिल फाउण्डेशनया नायः कृष्णवहादुर महर्जन, सल्लाहकार ई.दुर्कमान महर्जन, सल्लाहकार शम्भुराम महर्जन लगायतयापि पाहाकथं भायादीगु खः । उगु ज्याभवलय् थःगु नुगः खँ तयगु भवलय् राराहिल फाउण्डेशनया नायः कृष्णवहादुर महर्जनं राराहिल फाउण्डेशनं केन्द्रनाप जानाः मिसापिनिगु व मस्तयगु स्वास्थ्य मंकाः कथं ज्या याना वनेत सम्भौता जुइधुंकूगु खँ कनादिल ।

अथे हे शम्भुराम महर्जनं समुदाय पाखें संचालन जुयाच्वंगु थुगु केन्द्रयात ग्वाहालि यायेगु सकसिगु कर्तव्य खः धयादिल ।

ज्याभवःया सभानायो हिरा वहादुर महर्जनं सकसियागु ग्वाहालिं यानाः हे थ्व केन्द्र न्हय्दँ तक मदिकक संचालन याना च्वनेफुगु खँ कनादिसं ग्वाहालि यानादीपिं सकसितं सुभाय वियादिल । नापं थुगुसी हे केन्द्र न्हूगु थासय् संचालन यानाः अस्पतालया रुप बिइगु योजना दुगु खँ कनादिल ।

सन्याखुना

(पालुतःखा)



नरेन मान (खासी, किपू)

कम्पेया ला निधानी न्याकी, पायछि जुईक लाः ताय्की तू चिकं थलय् क्वाःकि, तेजपात नाप मसला संकी ।

चिकनय् मसला सिइउ सिइउ थें च्वंकी ताना तयागु ला मसला चिकं दुगु थलय् प्वंकी मेगु भुटुली लः गाक्क क्वाकी ला बूथें च्वंसा क्वाःलः उकि प्वंकी ॥

सवाः योथें चि तय्की, मिं तःप्वाः याकी

अले ग्वारा ग्वारा दाय्की

त्यानुसा भास भचालंकी,

तातु छकः याकी, इलय् बेलय् ला संकी ॥

इलं लाःसा कलायात छकः हाय्की

ला बूथें च्वंसा मि छकः दिदी

क्वाःगु ला भच्चा ख्वाउँकि, क्वय् जक छथाय् ल्यया तय्की भुटुमाटु च्वकं ला छकः न्हाय्की, सवाः स्वया मसला भच्चा तंकी मल्ता भच्चा स्वया तय्की, अप्ठः जुलकी सुथय् जात्रा न्याय्की हानं भुटु च्याका ला देछुइकी, घौछि ति गुरु गुरु दाय्की भास छक लंकी, तातू याकी, अय्ला भतिचा जक त्वंकी कलायात आः जिई मखु ताउत हाय्की, इलय् बेलय् ला संकी

उखेथुखे सना च्वतले ला क्वय्की, प्यंगती बाटा क्वाकी

गातथें च्वंसा ला क्वाःगु बाटाय् ध्वखंकी

तू चिकं क्वाकी, मिं, जि, हिं नाप सन्या क्वय्की

भम्सी वाग याकी, छगू थलय् तिसिदी

ध्वखंगु लाखय् भच्चा भच्चा तय्की

क्वय्का तःगु चिकं ला बाटाय् ह्वाकी

कन्हे सुथय् जीकि, सन्याखुना स्वं स्वं मन लयलय् ताय्की

अल् न्ह्याइपुक नखः न्याय्की

मेगस स्कूलया अभिभावक दिवस

किपूया नयाँबजारय् संचालन जुयाच्वंगु मेगस ईङ्गलिस स्कूलं म्हिग माघ २९ गते सनिवाः वाघभैरव बैक्वेट नगांया हलय् तःजिक अभिभावक दिवस हन । विद्यालय व्यवस्थापन समितिया नायः राजकुमार नकर्मिया सभानायोसुइ जूगु उगु ज्याभवःया मूपाहाँ कीर्तिपुर नगरपालिकाया वरिष्ठ लेखा अधिकृत सानुवाबु परियारं त्वारवालय् मत च्याकाः उलेज्या यानादीगु खः ।

अथेहे स्कूलया संचालक समितिया दुजःपिं मिलन मान महर्जन, सुरेश श्रेष्ठ, रमेश श्रेष्ठ, रेणुलाल महर्जन व अमरकाजी श्रेष्ठपिं पाहाँकथं भायादीगु खः ।

गुगू तगिंया विद्यार्थी अभिना महर्जनं लसकुस न्वचु वियादीगु खःसा, ५ तगिंया विद्यार्थीपिन्सं कुमार िप्याखँ हुलाः सकसितं लसकुस यानादीगु खः । अथेहे ६,७ व ८ तगिंया विद्यार्थीपिन्सं लसकुस म्ये न्यंकाःदीगु खः ।

उगु ज्याभवलय् ६ निसं १० तक तगिंया न्हापलाःपिं विद्यार्थीपिन्त राजकुमार नकर्मि सिरपाः इनाःदीगु खः । अथेहे कक्षा १ निसं ५ कक्षाय् न्हाप, ल्यू व लियान्ल्यूलापिं विद्यार्थीपिन्त सुरेस श्रेष्ठ सिरपाः इनाब्यूगु खः । ज्याभवःया दथुइ दथुइ विद्यार्थीपिन्सं म्ये, प्याखँ व हुलाप्याखँ नं प्रस्तुत यानाः न्ह्याइपुकुगु खः । थः मस्तयगु प्रस्तुति स्वयेत अभिभावकपिं यक्व हे उपस्थित जुयादीगु खः ।



**पिदंगु दु
स्वंगू सफू**

उपन्यास

थ्वया च्वंगु सः

न्वचू, उद्घोषण व एफ एम

संचालन कला नासः

चिनाखँ मुना ईब्यःया चिनाखँ



नजरराम महर्जनया
भिंछंगूगु उपन्यास
'थ्वया च्वंगु सः'

मू
निसः तका जक



श्रीकृष्ण महर्जनया
न्यागूगु सफू
'नासः'

मू
न्यय् तका जक



नाति महर्जनया
न्हापांगु सफू
'ईब्यःया चिनाखँ'

मू
सच्छि तका जक

थःगु प्रति

सुरक्षित

यानादिसँ

न्हि

स्वापू

४३३३००७,
९८४१४०१०७७